

VI.
ARREST DE
MORT,

Donné au Parlement de Bretagne.

Contre Damoiselle Marie de Sornin.

Accusée & conuaincue d'homicide par
l'Estrange Apparition de l'Esprit
de son feu mary.

Ensemble tout ce qui s'est passé de memorable en
l'Instruction de son procez criminel.



A PARIS,

Par P. METTAYER, Imprimeur & Li-
braire ordinaire du Roy.

M. DCXXXIII.

Avec Privilege de sa Majesté.

11





ARREST DE MORT
donné au Parlement de Bretagne, con-
tre Damoiselle Marie de Sornin, ac-
cusée & conuaincue d'homicide.



'Instance Criminelle d'ôt
 est question, a esté instrui-
 te par le Iuge criminel de
 Kimpercorentin en Basse
 Bretagne, du ressort du
 Parlement de ceste Pro-
 uince seant en la Ville de

Rennes.

Le faict est qu'un certain personna-
 ge nommé le Sieur de la Courtiniere, Gé-
 til-homme de l'une des antiennes maisons
 du pays, qui employoit la plus grande
 partie de son temps aux contentemens de
 la chasse, & alloit d'ordinaire coufiner,
 cōme c'est la coustume des Nobles de ses
 quartiers, de se visiter les vns & les autres.

Arriue qu'un iour ledit Sieur de la Courtiniere, qui estoit d'une tres-bonne humeur, & fort affectionné dans les compagnies fut visité, apres les Pasques, de plusieurs autres Gentils-hommes ses voisins & alliez, qui passerent ioyeusement leur temps dans son Chasteau, l'espace de trois à quatre iours avec toute sortes de contentemens honnestes.

Le soir dont la compagnie estoit partie l'apres dînée, il se passa entre sa femme & luy quelques petits discours, sur des remontrances qu'il luy fit: au subiect qu'elle n'auoit monstre aucune bonne action, ny bon visage à la compagnie, toutes-fois avec des paroles douces & honnestes, qui ne deuoient en aucune façon irriter la Damoiselle, laquelle de son humeur estoit fort hautaine, & d'une tres-malicieuse nature; qui pour lors ne tint pas grand discours à son mary reseruant ses malheureux desseins à l'occasion.

Sur ces propos le Gentil homme demande de se retirer en sa chambre, deux heures deuant son ordinaire, il y est conduit par son vaillet de chambre & un laquais qui le couchent pour prendre son repos, ayant esté grandement fatigué dās

les diuers exercices pendant ladite visite de ses voisins. Le voilà donc assoupy du sommeil extraordinairement à sa coustume.

L'heure ordinaire que la Damoiselle auoit de se retirer estant venuë, elle demande à l'une de ses filles de chambre son deshabillier, laquelle l'ayant esté querir dans la garderobe, proche de la chambre ou estoit couché son maistre, elle l'entend ronfler d'un sommeil extraordinaire dont elle donne aduis à la Damoiselle, & aussi du tort qu'elle pourroit faire à son mary, si elle aduenoit qu'en s'allant coucher elle luy rompast son repos, luy conseillant plustost de prendre pour ceste nuit la chambre plus proche.

La Damoiselle voyant le temps & l'occasion à propos d'executer ses desseins, fait tous ses efforts pour seduire l'un des domestiques de la maison, & une autre sienne seruante qu'elle cognoissoit estre d'humeur assez facile à corrompre, moyennant de bonnes recompenses: après auoir tiré d'eux, par des protestations & serments horribles, assurances de ne point declarer aucunes choses, elle leur declare ses pernicieuses intentions; &

pour les y faire plustost condescendre, elle leur offre donc à chacun d'eux, la somme de six cens liures, à quoy ils s'accorderent.

Cela fait, ils entrent tous trois dans la chambre (sçauoir la Damoiselle la premiere) ou estoit ledit Sieur de la Courtiniere couché; & comme dit est grandement assoupy de sommeil, & voyant que tout le reste des officiers de la maison estoient retirez, commencerent de massacrer le pauvre corps qui ne songeoit à rien moins qu'aux mauuaises intentions de ceste miserable femme.

Le meurtre de ce pauvre Gentil-homme estant perpetré par les inhumainitez de sa femme & de ses domestiques, ils porterent le corps enterrer dans l'un des Celliers du Chasteau, où ils firent vne fosse, laquelle apres auoir mis le corps en l'estat qu'ils l'auoient massacré: outre la terre le couurirent d'un grand charnier plein de chair de pourceau sallée, cela fait chacun s'en retourna coucher.

Le iour venu tous les autres officiers ne voyant leur maistre comme à leur ordinaire, se demandoient les vns aux autres si Monsieur estoit malade, où s'il auoit

pris quelques medecines ; Sur cela la Damaïfelle fit courir vn bruit parmy eux, qu'un sien amy eftoit venu la nuit precedente heurter au Chafteau , comme ils eftoient d'ans leur premier fommeil , & qu'ayant amené des cheuaux fuffifammēt pour tous, ils l'auoient fupplié de monter fur l'un d'iceux , d'autant que l'affaire eftoit preffée , pour aller feparer des autres Gentils-hommes leurs voisins qui eftoiēt fur les points de fe battre.

Cela fe paffe pour vn temps , le Sieur de la Courtiniere ne reuint point : La Damaïfelle s'aduife de faire courir vn autre bruit , qu'elle auoit eu aduis que fon mary paffant par vn bois , il auroit fait rencontre de volleurs qui l'auroient tué avec deux de fa cōpagnie, & pour ce faire , elle fait toute les mines neceffaires pour couvrir fon miserable homicide: elle fe velt de deuil , fait des diffimulées lamentations, commande que l'on face faire (dans les paroiffes qui leurs eftoient fubiectes) des feruices , pour prier Dieu pour le repos du deffunct. Chacun la vifite , elle continuē tousiours de contre-faire la dolente : de forte que iamais perfonne n'eust pensé à fa malice, n'eut esté que par la permiffion de

Dieu , qui voulut que le crime , quelque secret qu'il fust , se descouurist en ceste façon.

Le deffunct auoit vn frere qui venoit quelques-fois veoir sa belle sœur en sa maison , tant pour la consoler en ses dissimulées afflictions , que pour sçauoir d'elle l'estat de ses affaires, pour autant qu'il y auoit vn notable interrest ayant esté esleu (après la mort du deffunct) par Iustice subrogé de quatre enfans mineurs , sur la tutrice maternelle.

Vn iour se promenant sur les quatre à cinq heures de l'apres disnée dans le iardin du logis , comme il contemploit vn parterre remply de très belles tulippes & autres sortes de fleurs rares que deffunct son frere aymoît grandement , & prenoit beaucoup de peine à les conseruer, en ceste contēplatiō de son nez luy print à respandre quelques gouttes de sang, ce qu'il l'estonna fort , n'ayant iamais esté sa coustume de seigner par ceste partie.

En ceste action la memoire de feu son frere luy vint à la pensée extraordinairement , & dans le mesme instant luy fut aduis qu'il voyoit l'ombre de sondit frere deffunct , qui luy faisoit signe de la main,

& sembloit l'appeller.

Il ne s'estonne point, il suit l'ombre, apparente & non par imagination, iusques au Cellier de la maison & la voit iustemēt disparoistre au lieu où estoit le charnier. Il luy tombe pour lors au cœur quelque chose approchant de la verité du forfait perpétré, sans autrement s'en asseurer.

Il recite la vision de ceste Apparition à sa belle sœur, sur ce discours il la voit passer & chager de diuerses façons tout d'un coup, puis tout aussi tost rougir. Cela le fit soupçonner d'auantage, & reduire son soupçon en certitude. Et pour resolution il dit qu'il vouloit veoir sous ledit charnier, quelque chose qu'il en deust arriuer.

La femme resueillée vn petit, & faite audacieuse en sa crainte se mocque de ceste Apparition, & essaye d'empescher son beau-frere d'y aller, & à ne passer outre à son dessein, luy disant que si cela venoit à la cognoissance du monde qu'un chacun se mocqueroit de luy, & que par ce moyen il feroit la risée du peuple.

Tous les discours que la Damoiselle peust alleguer pour d'estourner se beau-frere, n'estoit que de mettre de l'huile dās le feu desia allumé: car tāt plus elle l'évou-

loit empescher de parole, plus il estoit des-
sireux de s'esclaircir de ce qu'il tenoit des-
ja pour tout certain.

Ainsi en presence de tesmoins il est fouïy
& beseché sous le charnier, & est trouué
le cadauer de son feu frere presque à demy
pourry.

Le corps est leué par le Iuge de Kim-
percorentin, qui en faiët son procez ver-
bal, veu, visité & recogneu pour le feu ma-
ry de ladite Damoiselle Marie de Sornin,
(ainsi estoit son nom) par les marques du
visage, qui n'estoient encores du tout ef-
facées.

Ladite Damoiselle de Sornin est prise
& apprehendée, on l'interroge sur cer-
tains faiëts & articles, elle varie en diuer-
ses façons, l'on faiët semblablement arre-
ster tous les domestiques de la maison
que l'on interroge separément les vns a-
pres les autres, qui manifesterent par leurs
depositions leurs innocēces, horsmis ledit
seruiteur & seruante de chābre qui estoïent
complices du meurtre, qui s'entrecoupe-
rent, & sur cela l'on iugea quelques cho-
ses d'eux.

On les presente à la question ordinaire
& extraordinaire; voyant qu'ils estoient

prest de la souffrir (aymāt mieux tout d'un coup souffrir la mort, cōme ils meritoiēt) confesserent le faict & chargerent ladite Damoiselle, contre laquelle auparauant il n'y auoit charge, sinon que le corps de son mary auoit esté trouué en la maison commune enterré sous vn charnier, & de l'apparitiō qui auoit descouuert le lieu en plein iour au frere du deffunct.

Le Iuge de Kimpercorentin par Sentence l'auroit condamnée d'auoir la teste trachée, & puis tous les mēbres de son corps dispercez en pieces, pour estre arts & bruslez, & les cendres iettées au vent, tous ses biens confisquezz pour estre employez en ceuures pieuses.

Le seruiteur, & seruante domestiques complices, d'auoir la main droite coupée vifs, & en apres estre pendus & estranglez, & leurs corps semblablement estre arts & bruslez & leurs cendres iettées au vent.

De ceste sentence la Damoiselle, & le seruiteur & seruante appelle en la Cour de Parlement de Bretagne.

La deposition du frere du deffunct qui auoit veu le spectre ou l'Apparitiō dispa- roistre à l'endroit du charnier & la descou-

uerture du corps en presence de tesmoins, les variations de la Damoiselle, & les confessions & accusations du seruiteur & de la seruante par tout le procez, les haines precedentes, les riottes, les menasses, le mauuais mesnage, & autres circonstances & dependances que la Cour sceut bien remarquer, furent cause qu'elle confirma de poinct en poinct.

Par son Arrest du mois de May, la Sentence du Iuge de Kimpercorentin fut reconfirmée, & furent renuoyez ladite Damoiselle de Sornin, seruiteur & seruante domestiques sur les lieux où auoit esté fait ledit meurtre, pour estre l'Arrest executé selon sa forme & teneur.

Sur telles matieres de procedures criminelles ie diray que ce n'estoit pas sans cause que les Antiens tenoiēt que les Ames de ceux qui auoient esté tuez erroient en les bas lieux iusques à ce qu'elles furent vengées, afin que les meurtriers n'eussent esperance que leurs crimes demeurast impuny. Ainsi dās le Tite Liue, les Manes de Virginie ne laisserent d'aller par les maisons des meurtriers de son honneur, iusques à

ce qu'elle fut entierement vangée, & *tunc demum Manes virginia mortue quàm viue feliciores per tot domos ad petendas pœnas vagatis nullo relicto. Sont tandem quicuerūt.* Le meurtrier ne peut autremēt qu'il ne soit en horreur de Dieu pour auoir violé les loix de nature, & commis tout à fait vn sacrilege en arrachant de viue force l'ame diuine du temple de son corps, ou Dieu l'auoit colloquée.

Voilà pourquoy quand il y a deffaut de preuues en vn crime d'homicide comme cestuy-cy, que Dieu en fait sa propre cause, ayant esté interessé le premier, & par moyens difficiles à cognoistre aux hommes, & faciles & aisez à luy, descouure ce qui estoit le plus caché.

Non sans cause la iustice de Dieu a permis que ce qui ne se pouuoit descouurir par tesmoins fut reuelé par l'Apparition du deffunct, toutes les Histoires saintes & autres sont remplies de telles matieres, ce qui nous doit faire croire lescdites Apparitions.

C'estoit pareillement l'opinion de nos vieux Gaulois, que le retour des ames & Apparitions de leurs ombres. Ils ont à la verité abiuré & hay les prestiges, mais ils

n'ont estez exempts de ceste simplicité dont parle Tertulian , & de la creance des choses supernaturelles & diuines & de l'immortalité de l'ame.

Et cōment est-ce que nos Gaulois n'eussent creu que les Ames retournoient, attēdu qu'ils croyēt la resurrection des corps? C'est le Poëte Lucain qui dit des Gaulois, *Maximus haud vrget lethi metus, inde ruen-
di in ferrum mens pœna viris, animæque capa-
ces mortis, & ignauum est reditura parcere vite.*

Ce n'estoit pas vne folle persuasion celle qu'auoient les Romains de l'Apparitiō des esprits en terre. Car les plus sages & mieux instruits des Payens de ce qui est celeste & diuin n'ont iamais denié que l'ombre des esprits retournassent.

Le plus diuin de tous les Philosophes, qui est Platon , admet que les ames peuuent errer aupres de leurs sepulchres, & monuments. Elles pourront donc bien venir iusques aux maisons.

Origene (*lib. 7. contra celsum*) entre les Docteurs de l'Eglise tient que les ames qui sont impures , & ne sont purgees des souilleures du corps & de la fange terrestre, errent tantost par les sepulchres, tantost logent dans les maisons, & tantost sōt attachées à d'autres lieux. *Cuiusmodi spiri-*

*tus illos credendū est qui omnibus seculis pre-
diti sunt & coerciti veneficiis, siue ipsi cum pra-
uitatis impuritate edificiis etiam locisque aliis
deputati.*

Après Origene, par ordres de temps, y
a Gregoire de Nisse qui affirme que d'or-
dinaire, & le plus souuent lon voit errer
des ames, notamment celles qui ont esté
forcée de payer le tribut à nature par ho-
micides, errer çà & là à l'entour des lieux
où ils sont enterrez, pour rendre des tes-
moignages que Dieu veut que iustice soit
faicte de ceux qui trament leurs mains
dans le sang de leur prochain, ce qui
doit encore plustost reconfirmer la verité
du fait contenu en ce present discours.

FIN.

